



Per blets èn las scolas plurilinguas ina schanza, per auters percunter in privel per las linguas minoritaras, il rumantsch ed il talian.

KEYSTONE

La plurilinguitad en scola

Avantatgs e ristgas da scolas plurilinguas

■ (cp) Ils 20 e 21 da schaner 2011 ha lieu en las localitads da la Scola auta da pedagogia dal Grischun ina dieta da perscrutaziun che vul stimular ad ina reflexiun davart las scolas bilinguas e plurilinguas. Per blets èn las scolas plurilinguas ina schanza, per auters percunter in privel per las linguas minoritaras, il rumantsch ed il talian. Scientificamain n'han ins però cumprovas ni per l'in ni per l'auter. La Scola auta da pedagogia dal Grischun SAPGR e l'Institut grischun per la perscrutaziun da la cultura IGC vulesan tematisar la dumonda davart il gudogn respectivamain las ristgas da scolas immersivas per las singulas gruppas linguisticas, surtut per las duas linguas minoritaras dal Grischun, il rumantsch ed il talian.

Igl è reussì als organisaturs da cumpilar in program interessant cun experts enconuschents da la Svizra e dals pajais cunfinants. Il program da gievgia, ils 20-1-2011 è public. Venderdi, ils 21-1-

2011 vegn lavurà en il rom da workshops en in ravugl pli pitschen.

Preschientscha internaziunala

Sco inputs en ils differents aspects tematics èn previs dudesch referats curts che preschentan scolas plurilinguas en l'Italia, l'Austria e natiralmain en Svizra e che cumpareglian ils divers sistems scolastics in cun l'auter. En l'optica dal Grischun sa tschenta natiralmain surtut la dumonda, tge models da scola che s'adattan spezialmain per il chantun Grischun triling e co ch'igl è pussaivel da mesirar quei scientificamain. La dieta da perscrutaziun vul surtut era tematisar nua ch'i mancan anc infurmaziuns e datas, perquai ch'ins n'ha anc betg retschertgà quels aspects. In'attenziun speziala vegn dada en il rom da la dieta a la persistenza, essend ch'igl existan gist en fatgs da scola savens differentas tesas cuntradictorias, senza disponer da retschertgas fundadas.

Collavuraziun da duas instituziuns grischunas

Cun ina dieta da perscrutaziun cuminaivla consolideschan la Scola auta da pedagogia dal Grischun SAPGR e l'Institut grischun per la perscrutaziun da la cultura IGC lur collavuraziun. La SAPGR dispona dapi il settember 2009 d'in uffizi da plurilinguitad, ed er a l'IGC survegnan dumondas da lingua, grazia ad in nov post per la perscrutaziun linguistica, medemamain dapli paisa. L'IGC offera dapi onns ina perscrutaziun da basa davart temas grischuns, la SAPGR è sa fatga in num ils davos onns surtut sin il champ da la perscrutaziun applitgada.

Cun la dieta da perscrutaziun «La plurilinguitad en scola» sa collian las duas instituziuns danovamain cun expertas ed experts da la Svizra e da l'ester, participond qua tras a la retschertga naziunala ed internaziunala e profitond a medem temp dal know-how da las referentas e dals referents.